

29 APR 1996

MAHATHIR PULANG DARI INDONESIA

KUALA LUMPUR, 29 April (Bernama) -- Perdana Menteri Datuk Seri Dr Mahathir Mohamad pulang dari Surakarta, Indonesia hari ini setelah memberikan penghormatan terakhir kepada jenazah Allahyarham Ibu Tien, isteri Presiden Soeharto, yang meninggal dunia semalam.

Perdana Menteri yang diiringi oleh isteri Datin Seri Dr Siti Hasmah Mohamad Ali, Menteri Luar Datuk Abdullah Haji Ahmad Badawi, Menteri Perpaduan Negara dan Pembangunan Masyarakat Datin Paduka Zaleha Ismail dan Duta Indonesia ke Malaysia Mohammad Jacob Dosto tiba di Lapangan Terbang Sultan Abdul Aziz Shah dengan pesawat khas Tentera Udara Diraja Malaysia.

Dr Mahathir dan rombongan berada selama kira-kira setengah jam di tempat ziarah di Dalem Kalitan di situ.

Beliau bersalaman dan berpelukan dengan Presiden Soeharto yang berada di samping jenazah isteri beliau serta bersalaman dengan anak-anaknya.

Dr Mahathir kemudian membaca doa bersama-sama isterinya beberapa minit di hadapan jenazah Allahyarham Ibu Tien.

Sebelum itu, Perdana Menteri sempat menemui Perdana Menteri Thailand Banharn Silpa-Archa dan Perdana Menteri Singapura Goh Chok Tong ketika berkumpul di Hotel Sahid Kusuma di bandar itu sebelum menyertai upacara menziarah jenazah Ibu Tien yang dikhaskan untuk tetamu khas dari luar Indonesia.

Sultan Brunei Sultan Hasanal Bolkiah dan Puan Ramos, isteri Presiden Filipina turut memberi penghormatan. -- BERNAMA